

09/12/1997

Dr M ke Teheran hari ini

SUBANG, Isnin - Datuk Seri Dr Mahathir Mohamad hari ini berlepas ke Teheran untuk menghadiri Sidang Kemuncak Pertubuhan Persidangan Negara Islam (OIC) kelapan selama tiga hari di Iran, mulai esok.

Perdana Menteri diiringi isteri, Datin Seri Dr Siti Hasmah Mohd Ali, serta beberapa pegawai kanan kerajaan lain.

Turut berada di Lapangan Terbang Sultan Abdul Aziz Shah untuk mengucapkan selamat jalan ialah Menteri Penerangan, Datuk Mohamed Rahmat; Menteri Pengangkutan, Datuk Seri Dr Ling Liong Sik; Menteri Pertahanan, Datuk Syed Hamid Albar; Menteri Pertanian, Datuk Dr Sulaiman Daud serta Menteri di Jabatan Perdana Menteri, Datuk Dr Abdul Hamid Othman.

Perdana Menteri adalah antara perwakilan 55 negara anggota yang hadir bagi membincangkan beberapa isu kepentingan bersama termasuk perdagangan mata wang yang perlu dikawal.

Selain menghadiri persidangan itu, Dr Mahathir dijangka mengadakan pertemuan dengan ketua-ketua kerajaan yang hadir bagi membincangkan beberapa isu, termasuk soal memperkukuhkan perpaduan di kalangan negara Islam.

Semalam, Perdana Menteri berkata beliau tidak akan mengemukakan sebarang syor khas bagi memperkukuhkan kerjasama di kalangan negara-negara anggota OIC.

Ketika ditemubual oleh Agensi Berita Republik Islam Iran (Irna) baru-baru ini, Dr Mahathir berkata OIC perlu berbuat lebih banyak lagi untuk memperkukuhkan perpaduan di kalangan negara-negara Islam.

(END)